


BOSTON
PUBLIC
LIBRARY

Shelf No.

2197.27



Q. D. B. V.

SCHEDIASMA ACADEMICVM
DE EO QVOD EST
MORIS
NOVISSIMI

IN REPVBLICA LITERARIA:

SIVE

Von der neuesten Mode bey der
Gelehrten Welt.

INDVLTV BENIGNO

AMPLISSIMI ORDINIS PHILOSOPHORVM

IN ALMA LVDOVICIANA,

PRAESIDE

DN. IO. CHRISTIANO LANGIO,

PROFESSORE PHILOSOPHO ORDINARIO

AC CELEBERRIMO,

PATRONO AC PRAECEPTORE SVO

PERPETIM DEVENERANDO,

PRO CONSEQUENDO

MAGISTERII GRADV

AD DIEM XX. SEPTEMBRIS MDCCXII.

PVBLCO EXAMINI PROPOSITVM

A

GEORGIO ADOLPHORVHFELIO,

WINNINGA MOSELLANO.

EDITIO SECVNDA.

GISSAE HASSORVM,

Typis & sumtibus Heredum B. IOH. REINH. VVLPPII. Acad. Typogr. 1714.

ILLVSTRIS AC INCLYTAE
ACADEMIAE
LVDOVICIANAE
MAXIMIS

H. T.

LYMINIBVS AC COLYMINIBVS:
MAGNIFICO DOMINO
RECTORI,

ET

VNIVERSIS QVOTQVOT SVNT
PROFESSORIBVS
IN OMNI ORDINE

EXCELLENTISSIMIS AC CELEBERRIMIS:
PATRONIS, ET PARTIM PRAECEPTO-
RIBVS SVIS,

OMNI QVO DEGET VENERATIONIS
CVLTV

SVBMISSE COLENDIS:

IN GRATI AC DEVOTI ANIMI
TESTIFICATIONEM,

OB BONA INNVMERA, QVIBVS
AB HAC ALMA STVDIORVM MATRE,
PRAESERTIM

PER THEOLOGICI AC PHILOSOPHICI
ORDINIS

DOCTORES DEXTERRIMOS AC FI-
DELISSIMOS,


IN EA AVCTVS FVIT,
HOC QVALE QVALE STVDIORVM
SPECIMEN

CVM PERENNANTIS FELICITATIS
APPRECIATIONE

submisso offert

GEORGIVS ADOLPHVS RÜHFELIUS.

Quam breuem nunc Dissertatiunculam B. L. legendam tibi offero, offerre quidem animus autea non erat; cum aliud mihi delectum esset argumentum, quod loco istiusmodi speciminis proponere decreueram. Cum autem aliis occupationibus ac studiis distracto eidem digne meditando ac elaborando huc usque satis vacare non licuerit; atque interim accederet Superiorum meorum iussus, qui **INCLYTAE HVIC LVDOVICIANAE**, in qua per integros quatuor annos, & quod ultra eos excurrit, tot bonis ac studiorum meorum commodis cumulatissime locupletatus fui, valedicere & Argentoratensem dehinc Academiam adire imperaret: ne sine aliquo publico studiorum meorum documento ac Testimonio abhinc discederem; animum induxi meum, hoc breue de Argumento designato Schediasma prout consequendis, ad quos **AMPLISSIMVS PHILOSOPHORVM ORDO** me benignissime admittet, Gradus Magisterii honoribus, publico Examine proponere; non dubitans fore, ut saltem eiusdem iucunda nouitas aliquam ipsi gratiam conciliet. Ansam ad id eligendum praeiuit ipse **EXCELLENTISSIMVS DN. PRAESES**, è cuius ore pleraque huc pertinentia excepi, quae partim in suis praelectionibus, partim intra colloquium priuatum, vtiliter ac doctè ea de re profudit. Meum itaque facio; quod meum non est; nisi quod ipsius Purpurae nonnihil de meo panno, quem quidem facile ab eadem discernes, licuerit assuere. Tu interim B. L. ac qui bonique consule hanc curtam mihi supellestem, quae ansam ad minimum & mihi & aliis poterit praebere, & ampliora & digniora de hoc non iniucundo nec infocundo argumento in posterum fortasse proferendi, atque antiquos etiam Eruditorum mores, de quibus hoc loco simul agere diffusa argumenti vetuit prolixitas, cum iis, qui nunc sunt, conferendi.


M Irare, & noli mirari, Lector, quod MOS, notissimus ille a Vi-
 ctus & Amictus variandi regimine trium Literarum Tyrannus,
 qui Simii in morem recens sibi genitos catulos mirum in mo-
 dum deamare solet, mox tanquam Ælurus aut Saturnus aliquis
 proprios rursus deuorat natos, & nouas subinde, quas ex se progignit,
 Consuetudines facit in priorum locum succedere, non tantum *Similem*,
 sed quoque *Literariam*, Rempublicam, & ea, quae ad vtramque pertinent,
 perpetuae morum vicissitudini reddat obnoxiam. Quæ enim aliter is potest
 facere, qui, dum sibi ipsi non constat, ipsa propemodum vicissitudo est,
 & Mos fere esse desinit, dum constans esse incipit; nisi forsitan existimes,
 illum potius dicendum *Morem* esse, qui absque vicissitudine Mos est. At-
 que utinam, si bonus est, semper talis extaret; si vero malus est, nunquam
 existeret talis; sed vices mutaret sine vicibus. Via itaque & pandenda est
 mori, atque etiam occludenda. *Pandenda*: si bonus est, ad aditum & re-
 ditum; si malus, ad abitum & exitum. *Occludenda*: si bonus est, ad abitum
 & exitum; si malus, ad aditum & reditum. Vnum vero est merito dolen-
 dum, siue bonus Mos fuerit, siue malus, quod regere eum se sinat huma-
 num genus, qui regi & seruire natus est, ac imperando, etiam si optimus
 fuerit, degenerat. Si quod tamen ipsi regimen est permittendum: felicius
 regeret, si regeretur; sique, qui eum regere debent, se ipsos regerent. Prae-
 clara enim & optima res est Mos, oculis etiam acutis prædita, & valde
 sciola; sed imperu tamen ac nimio sui amore plerumque coeca, imo, nisi
 dirigatur, noxia: eoque non tam coeca, quam oculis abutens quodammodo
 occoeecanda; ac similis reddenda Equo, qui clausis & obrectis oculis
 versandae mouendaeque molae adfuescit, eidemque prodest, si regitur, ob-
 est, si regit; nisi fortasse ex improviso prosit. Noli itaque mirari Moris
 Imperium, aut, si mauis, Tyrannidem, Imperii cupidam. Effert se in Do-
 minum Seruus, si seruo nimium Dominus permittit. Illud vero magis mi-
 reris, quod & ii eius se subiiciant imperio, qui eum dominio exuere, aut sal-
 tem regimen ipsius moderari debent. Jam, nosse si velis, qualis sit hodie
 Mos in Republica Literaria Sapientiam profitentium, qualemque in ea sese
 gerat: obserua mecum Moris in ea morem; ac deprehendes, eum nec opti-
 mum omnino esse, nec pessimum, sed optimo tamen quam pessimo in plu-
 ribus

ribus similiorem: Non Subditum prorsus, nec Principem prorsus, sed mīra coniunctione ac vicissitudine utrumque; hoc est, Seruum, in quantum regitur, Dominum, in quantum regit, aut Seruo tamen hodie, quam Domino, similiorem. Qui enim nunc prudentissimi sequuntur Morem; sequuntur ideo ea, quæ sunt boni moris, non quod illa sunt moris, sed quod esse debent. At cum quoque supersint plurimi, qui morem sequantur, quia mos est: apparet, nonnullas etiam dominii partes mori adhuc hodie relictas esse. Mihi vero, Viatorem ac Peregrinatorem adhuc agentem in orbe Literario, licebit quoque Spectatorem Moris & Exploratorem agere; & ea simul uti libertate, quæ alias peregrinantibus concessa est, ut dicant paulo liberius, quod sentiunt; utut sine auctoritate dixerint. *Primum tibi in mores peregrinatore dignos auspiciū erit, recte de moribus hominum iudicare, ne te fallat vitium, specie virtutis & umbra; ne statim omnia admireris, & quicquid peregrinum est, temere domesticis præferas.* Verba hæc sunt summi olim BOECLERI, dicentis ac differentis de *Peregrinatione Germanici Caesaris*. Caeterum, ut rem eandem diuersa specula varie reddunt, pro forma speculorum diuersa; sic de iisdem moribus diuersè iudicant diuersi. Optime vero quisque est facturus, qui animum suum curabit tali speculo reddi quam simillimum, quod, rectificatum satis, nunquam reddet imaginem, æ re ipsa, cuius est imago, alienam. Ad *Fortunam* denique aut *Fatum*, si quis ea, quæ nos *Moris* esse diximus, voluerit referre; ei, quod confido, facile conciliabimur. Non enim repugnat, ut, quod moris est, sit quoque suo modo *fatale* aut *fortuitum*, & vice versa, si quid *fatale* aut *fortuitum* est, abeat in *morem*. Subest enim humanis moribus aliquid fortunæ & fati; præsertim in illis rebus, quæ ab humano arbitrio non vnice pendent. Sed est tamen rationabilis mentis humanæ libertas supra fortunam atque fatum posita; quatenus veleat agere, quæ nulli fato aut fortunæ subsunt, vel agit quoque ea, quæ fatum aut fortuna postulant. Cedunt enim Rationi ac liberæ menti & fortuna & fatum, si rursus fortunæ & fato, in quantum par est, cedit mens libera & recta Ratio.

Caeterum, quæcunque est huius loci NOVITAS MORIS: ea pertinet vel ad ipsa studia literaria, vel ad *Senectutis* istorum Cultores; & quæ ad ipsa præsertim studia spectat, ea respicit vel *interiorem* vel *exteriorem* Studiorum rationem atque Cultum. Hæc si velis attendere: habebis, ad quod qualemcunque nostram hanc opellam licebit disperiri.

CAPVT I.

DE

EO, QVOD EST NOVISSIMI MORIS
CIRCA STUDIORVM DELECTVM, INTERIOREM.
QVE EORVM RATIONEM.

I.



Vaerimus fortasse *Novitatem*, vbi nulla est nouitas, & ipsa potius videtur rerum, morum, studiorumque *Antiquitas* subesse. Notissimum omnibus est SALOMONIS sapientissimi effatum, Eccles. cap. 1. v. 9. 10. *Quod fuit idem futurum est; & quod factum est idem fiet, ne quicquam sub Sole nouum: Est aliquid, quod tanquam nouum ostendatur, quod tamen iam fuit priscis temporibus, quae nos antecesserunt.* Cui quidem vexatissimo Sacrarum literarum oraculo prolixius declarando, non licet iam vacare. Quinimo & sua luce iam satis videntur verba radiare: nec dicam, esse absconditum, quid dicat Salomo, sed quam vere dicat. Offerunt enim se innumera, quae huic sententiae contrariari putes. Noua indies gignuntur *animantia*, & *res aliae nouae* quam plurimae. Prostant nouae *artes & inuenta*, quorum vix ullum in Antiquitate exstat vestigium; noui sese produnt *rerum actionumque euentus*; noua sese subinde exlerunt *prodigia*; aut, si summatim velis dici, nouae sese pandunt *scenae*, noui reperiuntur *actores ac spectatores*, nouae etiam in his luduntur *fabulae*: & ipsum *diuinorum operum amplissimum Theatrum* nouis semper admirandis conditoris sui gloriam amplificat, & *ἀπὸ τοῦ θεοῦ εἰς δόξαν* percipitur quotidie conuerti. Interea tamen & SALOMONEO DICTO constabit sua Veritas; si consideremus, quod non modo *Ideae* omnium rerum in mente infinita sint aeternae, eoque antiquissimae, sed *Semina quoque, fundamenta, genera & analogae seu paria* tam mirificae *varietatis rerum* in ipsa nouitate antiquitatem suam prodant: ita quidem, ut quae *specie* sunt noua, sint antiqua *genere*, quae *numero* 1. *exemplo* sunt noua, sint antiqua *specie*, & nihil fere sequiori tempore existat, quod sui simile prorsus non habeat in praecedenti. Idcirco semper

nobis

nobis in antiquitate nouitas, in nouitate antiquitas est agnoscenda : & possunt aliqua, quae noua in se non sunt, noua esse vicissitudine; imo *foens nouitatis* videtur quoque esse noua *pristinarum rerum coninnetio & combinatio*; quam vocant; quae in *infinitam* sese explicans *varietatem*, suis tamen non magis potest a principiis deflectere, quam corpora naturalia, & compositiones literatae & mulicae, à suis *elementis*. Sunt itaque & cogitata ac inuenta humana *antiqua* pariter ac *noua*, vel, quod fere perinde est, *finita* pariter ac *infinita*: Scilicet finita & antiqua *principiis*; infinita atque noua *progressibus*, horumque *varietate* ac *vicissitudine*: Ast ita tamen, vt ad *principia* subinde redeant, seruentque priorum similitudinem aliquam, & *terminentur* in illis, a quibus sua *initia* duxerunt. Exinde *Periodorum*, *Anacyclosum*, *Metamorphosium*, *Catastrophen*, & *Parallelismorum* enata est doctrina; nec defuerunt proinde, qui in Rerum temporumque cursu eiusmodi *Periodicas Analogias* obseruarunt, quatum *typum* aut *prototypum* in ipsa *Mosaica* de mundo condito *historia* latere statuerunt; ceu patet ex variis scriptoribus, qui praeter Patres ad *Hexaëmeron* sunt commentati; quos inter celebris est scriptor G. van der MEULEN, in Libro MDCXCIII. Amstelodami edito, quem *Signa Temporum semper sibi similia* inscripsit. Quapropter & nulla nobis maior prae nostris Antecessoribus relinquatur gloria; estque laudanda doctorum quorundam *Virorum* opera, qui *priscorum* ac *nouorum* hominum gloriam ac merita aequipararunt, & *nouarum rerum vestigia* atque *praeludia* in ipsa antiquitate cominonstrarunt. *Prisci* enim *sementem* nobis fecerunt; nos venimus in ipsorum *messiem*, & nostris quoque *successoribus* *sementem* facimus. Illi *fundamenta* iecerunt; nos *iactis* eorum *fundamentis* *superstruimus*: nisi quod *demoliamur* interdum, quod magno nisu ac molimine *instaurabit* posteritas. Quinimo, quod prudenter obseruauit CARDANVS, (*Paralipom.* cap. XIII.) solet quoque hoc euenire, ut *singulis temporibus*, *collectis in unum* multorum *laboribus*, *vnus pro multis* legatur, in cuius scriptis omnium *praeccedentium sententiae* *splendidius* comprehendantur, ut *seculo magis florido*, & a viro *sapientiore* *descriptae*. Hactenus CARDANI verba; quibus ipsa quoque fidem facit *Experientia*. *Vir bonus* autem, cui plurima tempora videntur *bona* tua credidisse, tam cito, ut SENECA alicubi ait, *nec fieri potest, nec intelligi*, & fortasse tanquam *Phoenix* *semel anno quingentesimo* nascitur; nec est mirum, ex *intervallo magna* generari. Sic *instauracione* quandoque nouum redditur, quod priorum temporum *incuria* est antiquatum. Et hisce qui-

quidem suppositis, monet nos instituti ratio, ut de eo nouissimo, de quo agere constitutum est, paucula quaedam proferamus.

II.

STVDIA quaedam dari, quae ex ipsa aut omni sua veluti *substantia* noua prorsus possint aestimari; id equidem ex ante dictis minus est probabile. Videntur enim tantummodo studiorum pristinorum *incrementa*, *decrementa*, & caetera genera *mutationis*, nouitatem per saepe studiis afferre: potestque speciatim HISTORIA de eo gloriari, quod *antiquae rei noua* semper proferat *exempla*, & *omnium Temporum studia* in scenam *sub eundem conspectum* producat. Praeter illam si reliquam PHILOLOGIAM ac PHILOSOPHIAM, atque vna cum iis THEOLOGIAM, IURISPRVDENTIAM ac MEDICINAM, (seu quod, si nomina in sensu & amplitudine conueniente, atque magis ex mente veterum accipiantur, prope modum perinde erit, METAPHYSICAM, POLITICAM ac PHYSICAM,) hoc loco nominaueris: hoc ipso *studiorum honestorum omnium* dederis complexum, quibus *sua contraria*, non aliter ac umbra corpori, accedunt.

III.

Verum in his omnibus considerandis, quid sit nouissimi Mōris, propius iam videamus, & paucis multa complectamur. Laudamus AETATIS NOSTRAE STVDIA: & quidem merito laudamus, quod non tam VERBALIA & IDEALIA, quam REALIA Objecta per ea consecremur. Laudabili sane instituto; dummodo duo priora non negligentur, & Harmoniae, quae est inter RES, VOCES, & IDEAS, sua semper constet integritas. Coniungimus proinde EXPERIENTIAM cum INTELLIGENTIA & ELOQVENTIA; *Sensum* cum *Ratione* atque *Lingua*: profecto *bene satis*; dum modo satis bene easdem coniungamus, & modum in his omnibus teneamus. Cum iisdem volumus quoque coniungi FIDEM, non coecam ac Carbonariam, sed rationali ac libera, addo & Christiana, mente dignam; in quo & nihil habeo desiderandum, nisi vt *Fides* nostra sit semper magis *diuina* quam *humana*; & illa quoque non tam *literalis* & *inoperosa*, quam *reali cum viuacitate efficax*. ECLECTICI porro hodie nos esse malumus, quam SECTARIJ; consecrantes nempe *Rationem* magis, quam *Auctoritatem*, *Libertatem* magis, quam *Seruitutem*; *Scientiam* magis, quam *Opinionem*: Et haec omnia satis bona; dummodo bene satis in his omnibus versemur, & modum in nullo eorum excedamus. Malu-

mus

mus item SCEPTICI magis esse, quam DOGMATICI, itemque IRENI-
CI magis, quam POLEMICI: & hoc bene satis, si modo dubitando veri-
tas non amittatur, sed acquiratur, nosque eScepticis aliquando conuerta-
mur in *Dogmaticos*, nec non ex *Irenicis*, si opus quandoque fuerit, mute-
mur in *Polemicos*, & rursus tamen, obtenta rationabili pace, ad *Irenicum*,
non *animum*, quem semper debemus vel in medio conflictu seruare inte-
grum, sed *statum* redeamus. Placent porro nobis non tam INSTRV-
MENTALIA, quam PRINCIPALIA, Studia. Existimamus, esse non
tam INTELLECTVS, quam VOLVNTATIS culturæ operam maxime
nauandam. Sectamur Eruditionem non tam SCHOLASTICAM,
quam POLITICAM, eoque non tam THEORETICAM, quam
PRACTICAM; scilicet non SCHOLAE, sed VITAE nostra Stu-
dia aptantes. Et hoc satis bene; dummodo suum cuique tribuamus,
neque, quod fere metuendum est, ad alterum extremum diuegamus,
& ea disiungamus, quae possunt ac debent esse coniunctissima. A-
uerfamur vero praecipue *PEDANTISMVM*, quem alii *Scholasticam*
abiectionem, alii *Paedagogicam affectationem*, atque alii fortasse aliter solent
appellare, & *Complexum* censere *plurimorum incommodorum*, quae moris
literarii nouitas hodie expungit; siue inepta in literis *lactantia* & *Ofentatio*,
siue *vana persuasio*, siue *morositas*, siue *singularitas*, siue *obscuritas*, siue
Barbaries, *morumque ac studiorum* homini docto ac literato conuenien-
tium *inconcinuitas*, vocentur, aut *alio quouis titulo* venire soleant ac pos-
sint. Euge; bonum factum: dummodo vna prospiciatur, ne *bestiae huic*
minus comtae ac desiderabili succedat altera, magis comtula, delicatula,
blandula, suaque proinde specie formosior, & primo sub aspectu amabilior;
at vero, si quid ipsi indulseris, moribus multo ferocior, & à solidae sapien-
tiae studiis reuera alienior. Hanc si *immoderatum GALANTISMVM*,
Pedantismo oppositum, velles nuncupare; titulum ei dares ipsius genio ma-
xime accommodum. Quare quidem nihil magis erit hac aetate proui-
dendum, quam ne *Charybdim* euitaturi incidamus in *Scyllam*, & *Pedan-*
tismo antea correpti, nunc *Galantismo* obruamur. Magnum nobis ad-
uersus haec mala erit praesidium, cum *Eruditione* sociata semper vera *Reli-*
gio, atque cum *Facilitate* Studiorum, coniuncta *Sollicitas*; dummodo & in-
uigilemus, ne intenti Eruditioni profanae, NATVRALISMO, & sacra-
rioribus dediti studiis ENTHVSIASMO, aut, per inconuenientem vtrius-
que conciliationem, SYNCRETISMO quodam aequè nociuo abripi nos
patiamur, sed his pariter ac caeteris quoque verae Eruditionis *perturbatio-*
nibus ac detrimentis mente ad Deum ejusque Legem semper conuersa,

cum prouida cura obuiam eamus; atque sic demum exornemus *Polymathiam* ac *Polyhistoriam*, quam more nouissimo aetas nostra sibi tribuit.

IV.

Ad *specialiorem* porro si accedamus *Studiorum* nostri temporis *considerationem*: habebimus & ibi variam nobis de nouissimo more gratulandi materiam. THEOLOGIA, nimis olim *Scholastica* ac *disputatoria*, ad *usus practicos* fontesque suos *genuinos* ac *sacratiores* magis magisque hodie reducitur; eoque etiam cum *Studio SS. Literarum*, propterque eas *Sacrarum* quoque *Linguarum*, *Antiquitatum*, *Historiarum*, & omnis generis *observationum Critico-Philologicarum*, vtilissime coniungitur. Pari- ter etiam videmus, coniungi *IVRISPRVDENTIAM Civilem* cum *natu- rali*, *genuinos legum omnium* recludi *fontes*, pandi earum *intimos recessus*, detegi ac corrigi *naeuos*, amplificari *usus*, & quae olim minus conduce- bant, ad *Reipublicae nostrae statum & commodum* magis magisque attempe- rari, veramque sic *Politicae verae Iurisprudentiae*, conatu laudatissimo, conciliari. *MEDICINAM* quoque deprehendimus, *Physiologicis*, *Anato- micis*, *Botanicis*, *Chymicis*, *Pharmaceuticis*, *Chirurgicis*, *Sympatheticis*, & aliis sui generis *experimentis* ac *inuentis*, caput suum magis magisque at- tollere, atque ex mere *Aphoristica & Empirica* in *Systematicam & Dogma- ticam* euadere. Nec minus proinde *PHILOSOPHIA*, caeteris omnibus profutura, totam se *rationalem & experimentalem* esse gloriatur, & eo se intentam esse monstrat, ut *exploratis & probatis per doctrinam* exquisitam omnibus, seruentur ea, quae sunt *optima & probatissima inuenta*. Habe- mus proinde *Antibarbaros Grammaticos*, *Philosophicos*, *Biblicos*, *Theologi- cos*, & si rem ipsam sine Titulo spectemus, etiam *Iuridicos*, *Medicos*, & quos- uis elios. Quibus praeterea accedit, quod nostrae aetati est prorsus peculia- re atque singulare, *exquisitissimum* per omnia genera *Doctrinae*, *HISTO- RIAE OMNIS*, & speciatim *LITERARIAE*, quam vocant, *STVDIVM*, per tot *Ephemerides*, *Recensiones & Observationes rariores* indies adhuc maiora incrementa capiens, *omnium monumentorum*, ad rei literarie e- molumenta quouis modo pertinentium, faciens notitiam, *posteriora prio- ribus* coniungens, *memoratu digna* conseruans, variasque ad vtilitates pro- ferens, & adeo sese conspicuam hoc tempore reddens, ut *seculo nostro HI- STORICI nomen ab eo esse impenendum*, doctis quibusdam Viris haud incongrue sit visum. Quae omnia certe sunt talia, ut in *Moribus* huius no- uissimis etiam bona *Fortuna* bonumque *Fatum* debeat agnosci, nihilque superfit, quam ut eam quoque in *Studiis specialioribus* adhibeamus cir- cumsp-

cum inspectionem atque providentiam, quam supra ut *Studiorum omnium moderatricem* nunquam non adhibendam commendauimus. Multum vero ad haec tanta incrementa *Historiae literariae*, quae olim iam VERVLAMIO ad scientias augendas erat desideratissima, contulit summi quondam MORHOFII doctrina rara & auctoritas, cuius celebratissimus POLYHISTOR nubem fere post se traxit POLYHISTORVM: euentu quidem satis etiam felici; dummodo tot essent *Morhofii*, quot *Polyhistores*.

V.

Praeviderunt autem HVNC SVMMVM, quo nos hodie gaudemus, LITERARVM FLOREM docti aliqui, qui ante nos vixerunt, Viri, & veluti vaticino spiritu eundem praedixerunt. In cuius rei exemplum etiam ipse DN. PRAESES, in Erudit. Protheor. cap. XV. pag. 847. produxit IACOBVM ACONTIVM, scriptorem satis celebrem, atque, si ex Remonstrantium elogio ipsius est metienda dignitas, Virum aeternae memoria dignum, qui in Epistola ad IOH. WOLFIVM, *Tigurinum*, scripta Londini XII. Calend. Decembr. MDLXII. vbi FRANCISCI PATRICII scripta laudat & admiratur, sequentis tenoris verba, notatu dignissima, profudit: *Intelligo etiam, ait, me in seculum insidisse, cultum praeter modum, nec tam certe vereor eorum, qui regnare nunc videntur, iudicia, quam exorientem quandam Seculi adhuc paulo cultioris lucem pertimesco. Et si enim multos habuit, habetque aetas nostra viros praestantes; adhuc tamen videre videor, nescio quid, magis futurum.* Cum quibus Acontii verbis caetera quoque velim conferri, quae in citato DNI Praesidis Libro I. c. leguntur vtilissime obseruata.

VI.

Sed ne de isto *Flore Literarum* ultra, quam fas est, gloriemur: audiamus etiam SEB. CASTELLIONEM, scriptorem satis quoque celebrem, qui in Epist. Dedicat. qua EDVARDO VI. (quem Titulo, à nostris moribus proh quantum alieno, *Angliae Regem clarissimum* compellat,) seculum suae aetatis tale quidem fuisse existimat, ut nihil eo fieri posset eruditius; sed idem tamen vna fatetur, profundis ignorantiae tenebris id adhuc esse immersum, ejusque rei certissimum ait esse testimonium, tam graues, tam pertinaces, tam perniciosas dissensiones, tam multos item & eorundem irritos conuentus de hisce controversiis, tantūq; numerum quotidie nascentium librorum, & eorum inter sese toto coelo dissidentium: addens denique, praeter interiecta vtilissima alia, tantis studiis, tanta linguarum cognitione, tot artibus, totque libris, per tot annos, tam parum adhuc esse profectum, ut indies in-

deterius abeant res : huiusque mali unam verissimamque causam existimatisse inuenisse, aversam a Spiritu Dei & veritatis VITIOSITATEM ac IMPIETATEM. Dixisse enim Danieli Angelum: Impie agent impii, nec intelligent ulli impii. Atque Dauidem contra: IOVAE metuentibus patefecit eius arcanum. Atque Esaïam: Preme oraculum, obsigna disciplinam apud discipulos meos. Vt caetera taceam lectu dignissima verba, in ista Epistola Castellionis c. l. reperiunda.

CAPVT II.

DE

EO, QVOD EST NOVISSIMI MORIS CIRCA RATIONEM ET CVLTVM STVDIORVM EXTERIOREM.

I.

Respondere INTERIORIBVS EXTERIORA, & Prouerbio frequentatum est, &, ipsa suffragante Veritate, exemplo & ratione comprobatum. Quid mirum igitur, si interior studii literarii ratio exterio-rem quoque formet, & nexu sociali post se trahat. Vnum vero est, quod nobis in hac commentatione potest non nihil negotii facessere: Hoc nempe, quatenus huius considerationis praecipua sint constituenda argumenta, in quibus, aut e quibus, studii literarii in habitu exteriori nouitas sit commonstranda. Videntur tamen omnia ad DVO porissimum CAPITA reduci posse: si quidem spectemus, quod, cum constituta sit ratio Interior, tum quoque Exterior ratio APPARATV pariter ac TRACTATV eidem percipiatur respondere; siue ad constituendas, siue ad propagandas disciplinas utramque deinde referatur.

II.

Ad APPARATVM pertinent imprimis DOCTORES VIVI atque MORTVI, h. e. PRAECEPTORES atque LIBRI: quos tales nobis deligimus, quales Moris nouissimi genius sibi deposcit. Ex utrisque nimirum placent nobis, qui Galantissimo quam Pedantismo sunt viciniore, & eos in se exprimunt characteres, quos postulat superius exposita Studio-
rum

rum ratio. Arridet enim nobis Doctrina, quae non tantum LECTIO-
NE, sed quoque MEDITATIONE & propria OBSERVATIONE est
parata; atque cum NOTITIA plurimarum rerum ubique coniungit
IVDICIVM, idque *acerrimum* pariter atque *liberrimum*, quod nul-
lam ad Auctoritatem se patitur adstringi. Ast debet tamen Doctrina
ex lege recentissimi Moris non solum ad VERITATEM, sed quo-
que AD HOMINEM vel maxime composita ac conformata esse: ideo-
que non *salebrosa* ac *difficilis*; sed *facilis* potius & *expedita*, & morem
Scholasticum etiam *Ciuii* & *Aulico* veluti More vel dissimulans, vel tem-
perans. Placet igitur *solida* quidem doctrina magis, quam *falsa* aut *super-
ficiaria*; ast hac lege, ut iis ea semper sit adpersa aut instructa *condimentis*,
quae ex nouissimo more sint nobis ad palatum, & nihil redoleant Schola-
sticum. Nam, sicut *Aulici* impensius cupiunt iam esse *Literati*, sic *Literati*
impensius cupiunt nunc esse *Aulici* sitis quidem sibi inuicem amici, quoad
mutuis, quae utrique delectantur, officiis & blandimentis sibi respondeant.

III.

Hos Characteres proinde sequitur *Apparatus literarius vniuersus*; si-
ue sit BIBLIOTHECARIVS, siue ECLOGARIVS, siue alio quouis titulo
insigniendus. Placet nobis BIBLIOTHECA *selecta* magis, quam *copiosa*:
illa nempe ad *Usum*, haec tantum ad *Notitiam*, & aliquando ad *Refugium*.
Placent LIBRI *rari*, *novi* & aliquid *reconditae doctrinae* habentes in recessu;
ex iisque EXCERPTORVM nostrorum PROMTVARIA; ac SCRIP-
TORVM nostrorum DOGVMENTA instruimus; praesertim, si nostrae
aetatis Aristarchi & Literariae historiae Antisites ac Duces Critici eos
esse *melioris notae comprobauerint*; quorum auctoritate *Libris* etiam *an-
tiquis* & *pulvere* dudum *obstitis*, ut e latibulis publicam denuo in lucem
protrahantur, sua quandoque reuiuiscit existimatio. Quare & *Bibliothe-
cas nostras* libenter habemus hodie instructas *eo apparatu*, e quo promi-
queat desiderata nobis haec cognitio. PLAGIARIOS & COMPILATO-
RES non potest ferre Moris nouissimi genius; neque delectatur CEN-
TONVM CONSARCINATORIBVS, qui *ex libris nonaginta nonem* si-
ne conuenientiratione *consciunt centesimum*. Honestioris vero condi-
tionis censentur esse EPITOMATORES & ECLOGARII, qui *Fontes*
magis adeunt quam *Riuulos*, atque cum *cura*, *fide* ac *selectu* rem suam egis-
se aestimantur. Laudabile hoc sane Moris hodierni institutum, dum mo-
do semper tuto satis fidere queamus *Aristarchorum nostri temporis iudicio*,
nec illi sibi ipsis interdum nimis confisi deprehendantur.

Ex Apparatu autem tali facile iam poteris conficere, quo *TRACTATV* seu *Modo tractandi* studia literaria hodie gaudeant: siue nobis ipsis tantummodo studeamus, siue aliis, quibus docendo pariter ac scribendo velimus inferuire. Sed, quia nemo fere est, qui sibi soli seruiat, aut si quis esset, suo etiam soli genio is foret relinquendus; de isto quidem solitario quorundam studio dicere non attinet; cum magis ad nos videantur pertinere illi, qui ita sibi ipsis profunt diligentia literaria, ut quoque aliis prodesse queant. Horum igitur nouissimum inspiciamus *Morem*; & videamus, qua *Lingua*, quo *Stilo* ac *genere Sermonis*, qua *Forma Doctrinae*, qua *consuetudine pingendi scribendique literas & voces*, quoque reliquo cultu externo, circa edenda *Doctrinae* suae *Specimina ac Monumenta*, utendum sibi esse ducant,

V.

LINGVA Eruditis nostri temporis CONSVETA non sola est *LATINA*, qua sine aliquid proferre, olim fere piaculi instar erat; sed quoque *VERNACULA*, & genti hominis cuiusque Literati domestica ac propria. Quod etsi aegere aliqui tulerunt, & adhuc aegre ferunt: negari tamen haud potest, fuisse nunc *utriusque Linguae usum* laudabili instituto introductum; dummodo *usus* semper contineatur *intra usum*, & nullus *abusui* in ulla locus detur. Neque enim sola *vernacula* est *abusui* exposita; cui dudum quoque *Latinam* fuisse deprehendimus obnoxiam. Contouerfiam qui nunc de eo mouent: videntur *statum Quaestionis controuersae* aut ignorare aut peruertere. QVÆSTIO enim vero NON EST, an semper & solummodo in *vernacula lingua* tradi disciplinae debeant, ita, ut nunquam tradantur in *Latina*, vel *alia*, quae propter rariorem *vlum* cum quadam Excellentia potest vocari erudita: Sed versa vice HÆC potius EST QVÆSTIO, an semper & solummodo in *Latina Lingua* tradi debeant honesta ac literaria *Studia*, ita, ut nunquam tradantur in *vernacula*. In hunc modum si *Quaestio* formetur; non dubitamus, eam confidenter negare: Cum, quod *Sapientia* debet etiam esse suo modo popularis, ideoq; & *populari lingua* tradi debet; tum, quod & *lingua ipsa* non repugnat, & facit hoc non modo ad *maiores propagationem Sapientiae*, sed & ad *maiores culturam linguae*, ceditq; & in honorem amoremq; gentis maiorem, sicuti id olim *Graeci & Romani*, hodie *Galli*, suo maxime *Exemplo* comprobant; ac denique, quod multum hoc facit ad *delegendum Spuriae Sapientiae Splendorem*, qui

qui saepe nullus foret, nisi ab *Existimatione linguae* aliqua ipsi accederet existimatio. Haud itaque metuendum est, ne *moderatae Linguae Vernaculae usus* genuina *vilescat Eruditio*: cuius nempe honor & existimatio multo praestantioribus, quam solius Linguae Latinae, niritur praesidiis; Neque vero per eum minuetur *Linguae Latinae elegantioris Studium*, sed crescit illud potius iuxta cum cultu *vernaculae*, sicque Latina nihilo minus manebit *vernacula inter Eruditos*, tamen si coniungatur cum illa, quae etiam *indoctis est vernacula*. Multum vero hic in parte nostra aetas debet Illustri Viro CHRISTIANO THOMASIO, qui primus fere *usum nostrae Vernaculae Philosophicum ac Literarium* cum Auctoritate ac singulari successu inter Germanos traduxit in *usum*: quem summum Virum plurimi deinde in eo sunt secuti. Quae autem vel ipsi, vel quoque Viro Celeber. IO. FRANC. BVDDEO sunt eo nomine publice obiectae in suis Apologeticis publice uterque etiam absterfir. Errant vero, qui *Linguae Vernaculae usum* putant nouissimi solammodo moris aut instituti esse. Legatur quae lo ipse Latinitatis princeps CICERO, princip. Lib. I. de finibus; & deprehendent illi, quid ipse ea de re senserit. Desideravit item hunc *vernaculae usum* ingeniosissimus quondam ac prudentissimus SCHVPPIVS, qui integro scripto eundem commendavit. Idem egit Cel. Erhardus WEIGELIVS, cui merito etiam adiungo Io. Ioach. BECCHERVM, & Christianum Theophilum GRAVIVM, Professore Herbornensem, qui anno MDCXCII. & MDCXCV. variis quoque scriptis pro vernacula introducenda laboravit. Vnicum adhuc, si placet, audiamus, *Graecissimum* pariter ac *Latinissimum* hominem, & inter Nouatores minime referendum; nempe Hieronymum WOLFIVM, qui in commentariis doctissimis ad Ciceronem de Offic. ubi col. 432. ad ista verba CICERONIS, quibus is *maximis in malis hoc tamen boni sibi affecutus videtur, ut ea literis mandaret, quae nec satis erant nota suis, & erant tamen cognitione dignissima*, his commentatur verbis: Idem, (Cicero) *copiosius* i. Tuscul. dicit, *Philosophia iacuit usq. hanc aetatem, nec ullum habuit lumen literarum Latinarum*. Quibus post pauca interiecta, (ad Germanicorum interpretum defectus ostendendos pertinentia,) idem subiicit WOLFIVS: *Quod si nobis aliquis contingeret, qui Philosophiam Germanicis literis illustraret, ut apud Latinos Cicero fecit; fortassis cultiores fierent mores, & politior oratio nostrorum hominum*. Postea cum difficultatem ob linguam nondum satis excultam exposuisset: Cicerone igitur, ait, nobis est opus, h. e. homine providentiae dono ad hanc rem nato atque facto; nec Graecis tantum & Latinis literis, atque omni disciplinarum genere erudito, sed in palatiis quoque Regum & Principum

cipum versato, & in vernaculi sermonis & Scriptionibus & Orarionibus diu multumque exercitato, quique ad hasce facultates & otio abundet, & innandae patriae cupiditate sit inflammatus. Haec WOLFIVS iste doctissimus, cuius desideria ac vota hodie implera sunt: praesertim si ea etiam spectemus, quae pro vernacula nostra magis magisque excolenda sub REGIS POTENTISSIMI Auspicio Berolini hodie aguntur; & recordemur quoque, quae de condenda Londini noua ACADEMIA ANGLICANA, ad Linguae illi genti vernaculae cultum itidem spectante, publicarum Relationum Schedae nuperrime perhibuerunt,

VI.

STILVVM vero & SERMONIS GENVS, quo docti ex nouissimo vtuntur more, si spectamus: est illud etiam Latine ad *popularem quasi vsum* magis hodie attemperatum, quam ad *Scholastico-Philosophicum*. Eliminantur enim ab eo aut parce admodum adhibentur antehac in Scholis frequentatae voces; quippe quae Doctis hodie videntur *horridae ac Barbarae*, verbisque nitidioribus redduntur. Instituto sane non contemnendo, & tuos intra limites commendando; dummodo per nouum hoc dicendi genus *Scholasticos*, quos vocant, *terminos* non prorsus abiicerent, sed suo quoque rationabili usui relinquerent. Prostant certe ipsius CICERONIS, nec non QVINTILIANI ac SENECAE, luculenta eam in rem testimonia; quibus docent, & *usum* eorum esse quandoque *utilem ac necessarium*, & volunt eos *Latina Ciuitate* etiam donari, existimantes, quod, *auditu duriores, sensu ac usu denique mollescant*. Liceat proferre hic ipsius DNI PRAESIDIS verba quaedam, huc apprime facientia, quibus in *Praefatione ad Nucleum Logicae Weiffanae*, qui cura ipsius illustratus ac prelo liberatus propediem prodibit, sequenti modo mentem suam exposuit. Fateor, ait, *horridam exempli loco videri usitatam de Praedicabilibus & Praedicamentis, nec non de Ante-Praedicamentis & Postpraedicamentis, aliisque similibus Doctrinam: Rem ipsam tamen sub eadem comprehensam si inspiciamus penitus, & vocabulorum artis insolentiae aliquid condonemus, quam Philosophis rationabilis quaedam breuiloquii seu contrahendae dictionis necessitas, vel ipsis Eloquentiae Romanae Principibus iam olim agnoscentibus & concedentibus, imposuit, qualemque etiam arti Venatoriae, Gladiatoriae, & cuiusque alteri nemo non lubentissime indulget, gloriolamque ex horum notitia & usu quandoque captat; non video, cur debeamus ab ista Doctrina abhorreere. Addo, quod nouissimum illud genus dicendi Linguarum Exoticarum, quae hodie maxime in usu & flore sunt, Idiotis-*

mis ac formulis plus iusto videatur abundare, easque praeter rationem quandoque affectare, sitque praeterea nimis saepe etiam *Dramatico-Satyricum*, ac eiusmodi loquendi formulis permixtum, quae moderatam ad conueniens decus Sermonis geauitatem minus deceant.

VII.

Ad FORMAM porro DOCTRINAE vel DISCIPLINAE quod attinet, quae METHODVS vocari alias solet: habet & in ea nouissimos aliquid peculiare. Est enim forma noua à legibus *Scholasticae Methodi* maxime aliena, & in plerisque *arbitraria*; quae ferre non potest Tractationem per *quatuor genera Causarum*, nec caeteros *Topicos* considerandi modos; praesertim si *Tabellarum Didacticarum*, quibus antehac literati homines delectabantur, *cancellis arte constructis comprehensa* ea veniant. Quocirca etiam amat DISCVRSIVA magis esse ac dici, itemque DIALOGISTICA & APHORISTICA magis, quam *Systematica*; nulli rerum dicendarum ordini se nimium adstringens, sed ordinem veluti in suis dictis *e re nata* captans. Hanc nouam, (si quidem noua est, cum & a prius Sapienibus, *Pythagora, Socrate, Platone, Cicerone & pluribus aliis* sit usurpata,) docendi discendique formam non equidem duco improbandam; quod illa certe suis quoque vñbus laudandis minime est destituta; praesertim, si ad doctrinae principia veluti *materialia*, quae liberius procedunt melius, itemque ad doctrinam *Exotericam & popularem*, quae exactiorem formam non requirit, referatur. Est vero altera Methodus ad *Acroamaticos vñs & consummationem doctrinae*, (si debito modo eadem vtaris, & cum discipulis ad exactiorem *theoriam* perducendis, eiusdemque cupidis, praesertim si prouectiores fuerint, debeas agere, magis proficua & conducibilis, *omnemque doctrinae æplæ ac necessariam exactitudinem*, dummodo ubique recte fuerit applicita, penitus exhaurit. Quocirca ILLVSTRIS haec LVDOVICIANA non abs re indignissime tulit illa, quae propter adhibitam hanc Methodum *plus iusto licentiosa*, (ne dicatur *proterua*,) *mens ac manus* aduersus Ipsius summe quondam meritum Pro-Cancellarium, B. FRID. N. TZSCHIVM, eiusque *doctissimam Dissertationem praeliminarem*, Commentario ad Capitulationem Iosephinam *praemissam eademque methodo conscriptam*, in Recensionibus nouorum librorum, quae sub *Nonae Bibliothecae titulo* Halae Saxonum hucusque prodierunt, parte earum XI^{ma}, superiori anno conuicia pariter atque ludibria iniquius ac indecentius obiecit: & breui fortasse dabitur occasio, pluribus haec vindicandi.

Sed vix credideris, quod & in PINGENDIS LITERIS, SCRIBENDISQUE VOCIBVS, ex allata ratione melioris Orthographiae, moris nouissimi usus sese exserat. Cum enim usu sit iam satis longo frequentatum, ut Litera I. *si vim haberet Consonantis*, per Characterem J. & Litera V. *si haberet vim Vocalis*, per Characterem U. exprimeretur: fit tamen hodie, ut duo isti Characteres J. & U. (ob rationem haud contemnendam, quod ne impe *antiquus Latinorum scribendi character* cum hisce *novis & alienis*, quas ignoret, formis non debeat misceri, quodque homines Latinae Linguae gigni *Vocalem* a *Consonante* vel sub eodem quoque characterē nosse debeant discernere,) e literaria Republica propemodum habeantur proscripti, & restituto, vel unice seruatō, antiquo Latino characterē rursus permurentur. Prohibet porro nouitas literati moris *Diphthongos* Æ & OE *coniunctas* in vnum characterem, & more antiquorum *Vocales*, e quibus constant, vult *seorsim* vel *disiunctim* scribi. Expunguntur item a vocibus *Apicum Notulae*, quibus vel *Tonus & Accentus* vocum, vel *Ablatini & Aduerbia*, signari hucusque consueuerunt; iisque fulcris aut apicibus virum doctum non indigere iudicatur. Hinc, quae antehac sic scribebantur, UVÆ ESU JUCUNDÆ: eas homo noui moris tenacior vix ederet, nisi hunc in modum scribantur, VVAE ESV IVCVNDAE. Atque idem in *Minori* quoque *Characterē*, (qui sequiori aetate, cum pura & antiqua Latinitas fere sepulta esset, introductus fuit,) noui moris auctores volunt obseruari: Sed nondum tamen de ratione scribendi certa, respectu dicti huius minoris Characteris, inter se consentientes. Equidem in eo, ut sic scriptae uvæ esu iucundæ, (ubi *Diphthongi* in vnum Characterem sunt contracti, & Characteres v & s pro consonantibus signandis adhibentur,) non debeant admitti, omnes conueniunt. Differunt vero rursus in eo, quod ALII velint ab initio semper adhiberi v non nexile, & scribi, vuae esu iucundae; ALII autem v non nexile velint semper tantum adhiberi in fine, & scribi, uuae esu iucundae; ALII denique v non nexile e characterē minori prorsus electum velint, & cupiant vbique scribi, uuae esu iucundae. PRIOR sententia hac nititur ratione, quod saltem ab initio dictionis antiquus Character v debeat quodammodo referri. ALTERA cauetur, quod litera non nexilis in fine vocis commodum possit habere locum. POSTREMA denique hoc fundamento suam scriptionem defendit, quod iste minoris formae Character, (quem aliqui Longobardi-

cum (ambigo an satis recte) vocant, & *Monachis* illius usum introductum tribuunt, tantummodo propter celeritatem scribendi fuerit adhibitum, eo-que ad antiquam literarum Latinarum formam maiorem, (quam capitalem & quadratam, itemque uncialem in grandiori charactere, vocant,) sit nullibi, & ne quidem in vocis principio, adstrictus, sed sua veluti natura literas semper requirat nexiles, etiam in fine vocis, non quidem ob necessitatē, sed tamen ob scribendi consuetudinē commodamque vniiformitatem, licite seruandas. Permittimus vero unicuique sua stare sententia, suaque consuetudine: nisi quod postremo tamen loco adducta scribendi ratio videatur prae gemina altera more nouissimo probari, atque etiam in antiquioribus libris, qui circa tempus inuentae artis Typographicae impressi sunt, nec non in ipsis MSCris-codicibus, deprehendatur plerumque fuisse usurpata; licet & altera scribendi ratio, (saltem prior,) exemplo usus antiqui non destituatur. LEGES itaque ORTHOGRAPHIAE RECEN-
TIORIS PROBATISSIMAE, (quae Typothesis, eidem in aduersis vel adhuc ignatis, multum solet negotii facessere,) si velles contrahere in Summam; videntur illae pauculis hisce monitis posse comprehendī. 1.) quod in Charactere Latino Maiori loco J & U vbique I & V, itemque loco Æ & OE, vbique AE & OE, sint adhibenda. 2.) quod in Charactere Latino Minori nusquam j & v, (nisi posterius vel à principio vel in fine vocis admittatur,) sed ubique i & u, itemque nusquam æ & œ, (quae tamen in antiquioribus quoque reperiuntur libris,) sed ubique ae & oe, debeant adhiberi. 3.) quod omnes Apicum notulae, (quales Aduerbiis maxime & Ablatis solent alias imponi, vel quoque ad Tonum vocis signandum in ipsis quandoque antiquioribus libris adhiberi,) a vocibus plane debeant abesse. Et sane vitio non potest verti, si in scribendo etiam sequamur ea, quae sunt probatissima; in quibus ne quidem minutiae viro docto temere aut leuiter sunt negligendae. Habet vero Orthographia ROMANA seu LATINA adhuc longe maiorem amplitudinem, si non tam spectemus, quales, sed quatenam literae singulis vocibus sint adhibendae. Qua certe in parte multum debemus Viris doctissimis, SCHVRZFLEISCHIO, MORISIO, atque CELLARIO, ut taceamus Gruterum, Lipsium, Dausquium, Aldum, & plures alios, qui ante ipsos Argumentum hoc tractarunt. De nostrae autem VERNACULAE orthographia nondum aequae constat; cum approbationem illa non inuenerint, quae a sodalibus quibusdam Societatis frugiferae à Palmis dictae circa eam sunt tentata ac proposita, & in ipsorum scriptis usurpata. Quare optandum foret, ut ista de re, (quae,

eum incerta relinquitur, multa post se trahit incommoda,) certi aliquid denique statueretur, tumque etiam in vltum uniformem traheretur.

IX.

His ita se habentibus, haud adeo obscurum erit, quod nouitas in RELIQUO etiam EXTERIORI CVLTU ex Moris nouissimi more studio literario obringat. Id quod e nulla quidem re magis, quam ex *RECEN- TIVM LIBRORVM* exteriore ornatu atque habitu videtur elucere. Nunquam enim vero nitidius, siue CHARTAM, siue TYPOS, siue CAETERA EXTERNA, spectes libri in publicum conspectum prodierunt, quam quidam hoc nostro tempore, (accedente & *COMPACTURAE* elegantia,) fieri spectamus. Cui nitori etiam ab eo singulare pretium accedit, quod CORRECTISSIMA velint Viri docti *sua opera* prodire, si modo iusto huic ipsorum desiderio semper ex aequo responderet viruperanda *Bibliopolarum* atque *Typographorum* incuria; licet inter illos quoque hodie existant *strenuam* huic rei *operam* nauantes Viri, qui magnum id propter & sui ordinis sunt ornamentum. Peculiare vero aliquid videntur iam praeseferre LIBRORVM TITVLI; quippe qui non tantum *brevi ac nervosa concinnitate* lectoribus placere volunt, sed etiam *inscriptionis raritate* quadam, aut tali tamen, quae non possit haberi pro *insolentia*, maiorem sibi student gratiam conciliare. Quae enim Lexica vel Dictionaria olim erant, ea hodie *Glossaria* malunt appellari; pro Curis substituuntur *Meletemata*; pro Fasciculo *Sylloge*; pro Indice *Elenchus* vel *Syllabus*; pro libro Memoriali *Polymerion*; pro Florilegio *Anthologia*; pro Notis *Scholia*; pro Systemate *Syntagma*; pro Compendio *Synopsis*; pro uniuersali Commentario *Pandectae*; pro Recensu Doctorum Nominum *Eponymologicum*; pro scriptis Irenicis *Henotica*; pro Diariis *Ephemerides*; pro Adduamentis *Auctaria* vel *Supplementa* aut *Sicilimenta*; pro Collectaneis *Analecta*; pro Excerptis *Eclogae*; pro Ineditis *Anecdota*; pro Suppositis *Hypobolimaea*; pro Sermone Inaugurali *Exegesis Parascenastica*: ut plura alia taceamus, quibus docti Viri ab usu nimis vulgati ingenii sui monumenta volunt atque solent distinguere. Similem vocabulorum varietatem in librorum titulis adhibitam notauit quoque Celeb. quondam MORHOEIVS, quando *Polybust. Liter. Lib. I. c. XXII.* non longe à principio sequentem in modum scribit: *Et quis recenseat omnia nostro tempore Mellificia, Promptuaria, Calligraphias, Aoraria, Apparatus, Parnassos, Scintillas, Flanissas, Flores, Florilegia, Miscellanea, Semestria, Onia, Promulsides, Coniectanea, Varias Lectiones, Observationes,*

Dies Caniculares, Sylvas, Adversaria, Singularia, Praevidanea, Analeſta, Dies Geniales, Scripturas, Exercitationes, Horum Sparſiones, Spicilegia, Memorabilia, Bene dicta, Landabilia, Notabilia, Cinnoſ, Politias Literarias, &c. Fuiffe autem hoc ipſum etiam antiqui moris, ut *Titulos* eiſmodi phœratos docti Viri præficerent ſuis libris: id certe poteſt velex ſolo GELLIO conſtare, qui non tantum Lib. I. cap. II. de iactabundo quodam Iuvene & vobilibus haud facile cognitis obitreperente quaedam conſignavit, ſed quoque Lib. XX. cap. ult. ubi rationem reddit; cur collectanea ſua *Noctes Atticas* inſcripſerit, plura ad Hiſtoriam antiquam *titulorum librorum* pertinentia ſuntul adduxit. Integrum quoque de pari prope modum argumento caput in ſuo de *prima ſcribendi origine* commentariolo, (quod eſt ordine XXXt.) interuit HERMANNVS HVGŌ, in cuius Principio ipſe non ſine aculeo ſcribit, quod hoc caput ſit futurum, *inſtar Campanici belluati capeti, varium & illuſum*, & iis maxime *incundum*, qui nihil velint chartariorum nominum ignorare. Caetera, quæ RV-DOLPHVS quoque CAPELLVS in Lectionibus Bibliothecariis Memorabilibus ad *Onomatologiam Bibliothecariam*, non Graecis modo & Latinis, ſed Hebraeis quoque uſitatam, pertinentia ex variis Diſtionariis collegit: ea *libros* proſus *generatim acceptos* reſpiciunt, & non ſunt aequè huius loci. Sinimus nos verò vnunquemque abundare ſuo ſenſu atque titulo, nec improbanus omnino *morem ſuum non-antiquum*: dummodo abſit ab iſto librorum cultu literaria *vanitas, inſolentia & oſtentatio*; qualem perſtringit Illuſtris THOMASIVS in Praefatione ad Iuriſprudentiam diuinam in illis, qui loco *Praefationis* malleint *Anteſationem* dicere. Magno ſane libris Tituli ſunt ornamento pariter ac commodo, faciuntque non modo ad *Librorum diſtinctionem*, ſed quoque ad *allegationis commoditatem & operis commendationem*; praefertim ſi ſint *accommodi, perſpicui, ſufficientes, omni apteque diſpoſiti*, ac interioribus eorum reſpondentes, & quendam veluti ipſorum characterem videantur exprimere.

X.

At verò, quàm multa & varia ſunt illa, quæ praeter librorum *Charactam, Typos, Accurationem* atque *Titulos*, ad *cultum hunc exteriorem* poterunt reſerui. Offerunt ſeſe in iis etiam SVMMARIA, quæ more no- viſſimo LEMMATA potius vocaueris: videasque libris horumque par- tibus vel *praepoſita*, vel *poſtpoſita*, vel quoque ad marginem *appoſita*, ſuo- que peculiari typo ab ipſo librorum contextu eleganter diſtincta, & ubi ſunt leguntur, in *columnas longiorum aut breviorum linearum* concin-

na varietate distributa. *Substratae* etiam textui conspiciuntur varii generis NOTVLAE & ALLEGATIONES, non copia, sed raritate & selectu, commendabiles, signisque vel numeralibus, vel literalibus, vel illiteratis quoque, qualia sunt *Asterisci* & *Notae cruciformes*, insignitae; quorum omnium usus diuersus apud diuersos esse solet. Habent porro suas quoque *Veneres librorum* ex genere diuerso INDICES, in ipsa breuitate verborum rerumque copiam subministrantes, eamque concinna varietate sic digestam, ut eo se uoluere nec iniucundum sit, nec etiam frustraneum. Singularem deinde gratiam quaerunt aliqui in elegantis *Sculpturae* vel *Caesurae* IMAGINIBVS, quibus librorum frontispicia, veluti *Emblematibus* aut *Hieroglyphicis* quibusdam, solent exornare; nec non in LINEIS, quibus vel contextum primarium à subiectis quibuscunque Annotationibus distinguunt, vel eundem dispartitiuntur in duas pluresue columnas literatas, aut praeter hunc vltum inscriptiones quarundam partium insigniores, more Anglis maxime consueto, ita complectuntur, prout vnicuique id posse quam elegantissime fieri videtur. Placent porro hodie MAIORES TYPI prae minoribus, & maxime *Scriptorum*, qui citantur, nomina extantiori Typorum caractere exprimuntur. Placet item NVMERORVM character *Romanus* prae *Barbaro* minoris notae, & quoties *Annorum numerus* aliquis est designandus, iucundior est in ipso *Romani* characteris usu antiquior & rarior forma prae recentiori & frequentiori; eoque, si exemplum desideres, pro MDCXCII. solet potius CIO IO C VIII C. vel quoq; pro signando *Millenario* nota ∞ ut minus vulgaris adhiberi. Amant & aliqui *Typos* ERECTOS, aliqui vero INCLINATOS ac veluti CVRRENTES, hisque potius, quam illis, libros suos volunt exscribi. Sunt item, qui varietatem magis, sunt quoq; qui simplicitatem & uniformitatem in omni caractere Typorum, sectandam sibi ducunt. Aliqui porro parcius, (quod hodie *Viris doctis* magis videtur arridere,) alii vero crebrius MAIVSCVLIS seu capitalibus LITERIS in vocum frontispicio vtuntur. Absunt denique à libris ELOGIA & varii generis POEMATATA aut CARMINA, quibus Maiorum libri solebant exornari; &, si quid illorum loco hodie accesserit, EPISTOLAE, elegantes maiorem gratiam quam Carmina inveniunt. Omnia haec satis bene; dummodo de vniuersis satis iam constaret, quid sit in omni isto more probatissimum; ne sit nouitas Moris sine utilitate, sed potius deprehensa utilitas nouitatem aliquando tollat. Ipsa enim mutatio consuetudinis, etiam quae utilitate adiunget, tamen Nouitate

perturbat: Quapropter, quae utilis non est, perturbatione infructuosa consequenter noxia est; ut ait AVGVSTINVS, Epist. ad Januarium.

CAPVT III.

D E

EO, QVOD EST NOVISSIMI MORIS
CIRCA ILLVD DECORVM, QVOD AD IPSOS STUDIORVM CVLTORES CVM INTERIORI TVM
EXTERIORI RATIONE EXISTIMATVR PERTINERE.

I.

EX ratione studiorum, eum *interiori*, tum *exteriori*, de qua vtraque verba quaedam hactenus sunt facta, pender porro & omne illud τὸ ΠΡΕΠΟΝ siue DECORVM, quod suae etiam Personae utraque ratione convenire censent ii, qui circa studia pro designata ratione digni cupiunt versari. Quocirca etiam haud foret adeo difficile, IDEAM quandam vel CHARACTEREM exhibere ac proponere, qui possit ELEGANTIORIS LITERATURAE HOMINEM tanquam in breui Tabula referre, eumque talem nobis sistere, qualis & ipse voluerit ab omnibus cognosci & haberi. Non enim quicquam aliud ad id videtur opus esse, quam ut personae hominis literati propria iam quoque faciamus illa, quae sunt de ipsis literariis studiis in praecedentibus proposita. Summam tamen eorum, quae ad Personam sunt contrahenda, si desideres: habebis illam, si vel sola attentius considerata tibi sumas *venusta illa Nominum Eloquia & Axiomata*, quibus praesertim GALLI, (Gens illa cultissima, a quibus nostra Germania suos hucusque contraxit mores,) HOMINEM ex recentissimo more tam ELEGANTER ERVDITVM & LITERARVM STUDIIS EXCVLTVM, vocando ipsum un *HONNETE HOMME*, un *HOMME SCAVANT*, un *BEL ESPRIT*, un *HOMME DE BON GOVST*, un *HOMME GALANT*, eoque tali praeditum animo, qui soit solide, brillant, penetrant, delicat, fertile, juste, universel, clair & modeste.

desse, veluti summatim solent exornare. Ad quorum Nominum perspicuendas Emphases, clarissimi commentarii loco adhiberi potest illustris THOMASII *Discursus*, quem vocat, de *Gallis prudenter imitandis*, qui inter Ipsius *Opuscula Germanica* primo statim conspiciendus loco rederitur.

III. TITULUS

Huic proinde *Characteri* cum interiora & exteriora quaevis in homine tam eleganter erudito conuenire debeant: omnia porro dixerim, si eius ANIMVM ac DESIDERIA, omnemque exteriorem personae habitum sic dixerim eidem respondere, ut quoque in VICTV & AMICTV, in LINGVA & VOCE, in GESTV & INCESSV, omnique sua CONVERSATIONE, character iste ubique appareat expressus. Quamobrem & ista elegantis Literati pulchritudo non potuit amplius sub PALLIO demisso, & BARBA promissa, ex more Veterum Philosophorum, veluti obiecta aut obscurata contineri: sed, altero abiecto, atque altera abrafa, voluit ea *Ciuioris vitae studium* iam tandem prae se ferre, eoque etiam ad *Aulici moris venustatem* magis magisque sese conformare, nec cedere in eo ARISTOTELI, qui, etsi vulgo ab ista Elegantia est parum notus, *veste tamen insigni*, itemque *confura* atque *annulis*, prae multis aliis Veterum Philosophorum *usus esse* perhibetur, teste LAERTIO in eius vita, nec non AELIANO Lib. IV. Cap. IX. cum quibus & Alexander ab ALEXANDRO, Genial. Diar. Lib. V. Cap. XVIII. (ubi de *de diverso vestitu Veterum Philosophorum* summarim aliqua commemorauit,) poterit conferri. Equidem & id bene satis: dummodo *Sapientia*, (quae olim, ut CICERO aiebat de Diogene, sub sordido quoque interdum Pallio latebat,) sub *elegantiiori isto habitu* adhuc sit conseruata, nec *pristina Auctoritate*, quam multum prisci sapientes in imperitiorum animis valebant, *una cum pallio ac barba* senserit se esse *desitutam*, neque etiam *gladio nunc accincta* *pristinam innocentiam* videri queat hodie deposuisse.

III.

Comprobant vero hanc *Moris Elegantiam*, quam Viri Docti hodie sibi conuenire iudicant, eorum etiam IMAGINES s. ICONES, quibus *vix alio*, quam *eleganti, ac veluti Mercuriali habitu* conspiciuntur, quasque ab inciso aere expressas solent *exornandis libris* vel ipsi vel alii praefigere. Comprobat item eandem probata ipsis SVA NOMINA EXPRIMENDI SIMPLICITAS, quae, *sine adhibita antehac consueta Titulorum Pompa & variorum munerum amplissimo recensu*, utendum sibi esse ducunt:

cunt: daturi in eo vel aliquod Modestiae suae documentum, vel etiam existimantes, esse id multo magis ex honore, si tanta fuerint ipsorum merita, ac tanta meritorum fama, ut vel solo conspecto ipsorum nomine persona iam satis per se nota cuique habeatur. Licet enim & Viri sapientes, inque munerum amplissimorum dignitate constituti, absque vana ostentatione, possint ac soleant quandoque conuenienti loco titulos quosdam suis nominibus adicere, nec statim iis conspectis debeant illi istius vitii insimulari, faciatque praeterea recens ista Titulorum ad publicam eamque non inutilem notitiam: certum tamen est, quod saltem in opinione hominum reddantur Viri docti Titulorum phaleris suspecti, horumque simplicitas itemque infrequentia aut abstinentia, (quanquam indicio admodum fallaci,) morum modestiae ac elegantiae conuenientiores habeantur. Celebres alias ab ista vanitate ITALORVM & HISPANORVM sunt ineptiae, à quibus nos Germani non aequè, ac Galli nobis temperamus: qua de re legi meretur Ioh. BERSAND libellus doctissimus, quem de Venatione hominum inscripsit, cuius cap. XVIII agitur de Titulorum vanitate, in Italis maxime & Hispanis prae aliis notabili, ac Titulorum simplicitas in aëno simpliciore spectanda proponitur, & admonitio denique subiicitur esse LATITIVLOCREPOS, qui vento pasci velint, & vanitate ista delectentur, desideratis titulis merito maestandos, ut nempe stultis spargantur odores, quos tam impense videantur anhelare. Speciatim quoque TITVLORVM ACADEMICORVM vanitatem, & modestiam eorum in speciem deprecationem, ingeniole ac eleganter, uti solet, perstrinxit Ioh. Valent. ANDREAE, in Menippo, cap. XXXIII, ut alia huc pertinentia praetereamus. Sed viuimus tamen ea iam aetate, qua Academici Tituli, a Doctoratus aut Magisterii gradibus insignes, adeo fere sunt contemti, ut ex nouissimo more plurimi Doctissimorum Virorum, qui sunt eorum Axiomatibus condecorati, iisdem abstineant, eosque non tam honori, quam pudori, sibi ducant. Id quod mirum certe esse non debet, sicogitemus, vix potuisse aliter fieri, quam ut tantus istorum Titulorum & Graduum Abusus in Contemptum denique conuerteretur. Honestior tamen adhuc paulo permansit DOCTORIS quam MAGISTRI Titulus; ex ea ipsa fortasse ratione, quod is non aequè, atque hic, tam enormi abusu fuerit obnoxius. Audiamus ea de re Ictum summum, Plin-
sum HVBERVVM, qui in Oratione elegantissima de Pedantismo sequentis tenoris in hanc rem profudit verba: Quia etiam superiore seculo Tha-
les

les ille Gallicus, quem Lipsius appellat, Michael Montanus, suo tempore pro Exemplo & Synonymia Pedantismi narrat usurpatum fuisse Magisterii Titulum, ut idem esset Magistri atque Pedantae cognomen. Unde prudenter non ita pridem Philosophi nostrates Magistri nomen Titulo Doctoris Philosophiae magno consensu tegere & illustrare voluerunt. Nam illud Magistri ψιδὸν nudum nimis & tritum vulgatumque enaserat; quod admodum vereor, ne aliquando ipsis Doctoribus eueniat, ut horum quoque vititas non Tituli commentu detergenda videatur. Mundus regitur opinionibus, & haec nominibus magis, quam rerum differentiis, afficiuntur, maxime in honoris reputationibus. Haecenus celebratissimi istius ICTi verba; quibus tamen me non induci passus sum, ut a consecretando Magistri Titulo & Gradu abhorrerem, si modo non indignus inueniatur, quin possim eodem exornari. Et sane optandum esset, ut Viri, qui eum maxime merentur, eodem quoque uterentur, & usu eiusdem ipsis condigno ab abusu pariter atque contemptu eundem aliquando vindicarent.

IV.


Pertinet porro ad hanc Nouitatem Moris CIRCA TITVLOS, & alterum aliquid, hoc loco commemoratu non indignum, quo fieri deprehendimus, ut Academici Professores & Reipublicae literariae Proceres haud pauci ALIIS quoque hoc tempore MVNERIS SVI TITVLIS se velint insigniri, & ipsi se insigniant. Qui enim olim Professores Graecae & Hebraeae Linguae, Professores Latinae Linguae & Poeseos, Professores Logicae & Metaphysicae, Professores Physicae, Professores Ethicae & Politicae, solebant ac volebant appellari: eos hodie Professores Graecae & Orientis Linguarum, Professores vtriusque Eloquentiae, Professores Primae & Rationalis Philosophiae, Professores Philosophiae Naturalis, itemque Professores Philosophiae Moralis & Civilis, ex nouissimo more videmus nominari, ac se ipsos nominare; eoque contemptum, cui doctrinarum optimarum abusus aut neglectus ipsorum quoque optima munera fecerant obnoxia, prudenter auertere. Quis enim neget, disciplinas egregias, quoties in imperitos vel discipulos vel doctores incidunt, multum de splendore suo amittere; sicq; opus quandoque esse, ut TITVLI NOVITATE contemptus auertatur & pristinae Existimatio restituatur. Quaeso enim, quam celebre ac illustre olim erat antiquum SOPHISTARVM nomen? quod sequens tamen aetas maximo habuit contemptu; adeo, ut qui Sophistae prius vocabantur, Philosophi deinde mallent appellari: sed cuius tamen & ipsius tituli existimatio suas habuit vicissitudines. Audiamus si placet, Iacobum PONTANVM, celeberrimum

brem Iesuitam, qui, cum in Progymnasmatum Latinitatis Volum. I, Progymnas. I. loco *Grammatici* DOCTOREM LITERARVM nominasset; in Annot. hanc reddit Appellationis rationem: *Magistros Grammaticae, ait, nitidius & honoratius ita vocabimus; voce nimirum generali, respiciente ipsum nomen artis, quod à literis ductum est.* Et paulo post; qui in *Academiis* scientiam hanc profitentur, *Latinae Linguae Professores* audire volunt, & ipsi hoc se nomine afficiunt. Id neque falso, quod omnes vident, neque iniuste, quando *Grammatici* nomen hoc *Seculo* vilescit ac despiciunt. Et *Seneca Epist. XCV. custodes Latinitatis nuncupat.* De elegantissimi *Nominis POLYHISTORVM* aduersa fortuna *Clar. IOH. MOLLERVS* Praefat. ad *Polyhistor. Morhofian.* non longe à principio aliqua etiam commemorauit: quibus possent plura alia adiungi, si quidem prolixius id esset deducendum. Venit tamen in mentem, quod etiam *HYBERVS*, in *Oratione* supra cit. ex *Plutarcho de Alexandri M. quondam Ephoro Leopide* commemorat, quod scilicet & ille ex pari ratione non amplius, consueto sua aetate *Titulo, Alexandri Paedagogus*, sed *Altor* potius ac *Præceptor*, voluerit tum appellari. Singulare vero est, quod solae *HISTORIARVM* atq; *MATHEMATVM Professiones* honorem & *Titulum* antiquum integrum in *Academiis* prae caeteris omnibus seruauerint: id quod ex eo videtur esse deducendum, quod vel *maior lucunditas*, iuxta eum *Utilitate*, eas commendat, vel quoque *ratio argumenti*, circa quod versantur, ab abusu & contentu facilius easdem praefuerit. Multum vero speciatim aliquos offendit *nouum*, vel potius ex ipsa *Antiquitate instauratum*, *PRI-MAE & RATIONALIS PHILOSOPHIAE Nomen*; quos inter fuit quoque *Vir* satis celebris ac notus *Marius NIZOLIVS*, qui *Lib. III. Antibarbari* sui *Philosoph.* indigne hoc ipsum tulit, quod, cum *tota Philosophia Rationalis* sit, *sola Logica* Elogium hoc sibi vendicauerit. Sed docte huic respondet eiusdem Editor *Illustris LEIBNIZIVS*, quando in adiecta notula scribit: *Physica Rationalis quidem, sed tamen non agit de Ratione.* Dubium de caetero non est, quin nomen istud *Philosophiae Rationalis* iam satis sit antiquum, & originem trahat ab *antiquissima Philosophiae* in *ἡθικῇ φιλοσοφίᾳ* & *λογικῇ* distinctione; cuius loco apud Latinos diuisio in *MORALEM, NATVRALEM & RATIONALEM Philosophiam* fuisse adhibitam, vel ex solo *SENECA Epist. LXXXIX.* satis manifesto poterit constare. Hinc quoque non desunt remotiora ab aetate nostra doctorum Virorum *Exempla*, qui *Logicam Rationalis Philosophiae Titulo* condecorantur: ceu pater ex ediris sub eo *Titulo libellis Logicis, Edmundi SCHNIDERI, Professo-*

ris quondam in ordine Cisteriensium Pontificii, atque Nostratis *Antonii* ITTERI; ut Celeberrimi quondam in Academia Wittebergenſi Profeſſoris *Chriſtiani* DONATI, qui teſte *Adolpho* CLARMVNDŌ in Exercit. Hiſtor de praecipuis Topic. Explanatoribus p. 27. & 68. *Philosophiam Rationalem* reliquit in MSCro, atque etiam in Epitaphio *Primae & Rationalis Philoſ. Profeſſor* digniſſime fuit appellatus.

EPILOGVS.

PLura de NOVISSIMO in Republica Literaria More praefentibus ſubiicere nec libet, neque vacat. Poteruntque in Argumento hoc ampliſſimo *Ichnographiae* aut *Sciagraphiae* qualiſcunq; loco particula haecce iam ſufficere. Liberiſus dicta aequi boniq; conſulent PROCERES *praeclarae huius Reipublicae*: cuius Compages ad formam *Aristocratiae*, quae eius etiam naturae eſt maxime omnium accommoda, videtur proxime accedere; ſed ita tamen, vt omnibus eiſdem ciuib; *moderatus Libertatis naturalis uſus* recte ſimul concedatur. NOVEN vero in hac Literaria Republica recte videntur poſſe requiri *hominum* GENERA: Videlicet *INVENTORVM, NARRATORVM, CENSORVM, CONDITORVM, DOCTORVM, SECTORVM, AVCTORVM, CONSERVATORVM, VINDICATORVM*; horumque *uniuerſalem* quandam introduci *Societatem* ac *Socialitatem*, (quanquam maximus animorum Diſſenſus videatur obſtare,) impoſſibile non eſt. Poſteſtque *unusquiſque* huius Reipublicae *CIVIS* nouem iſtorum in hac Republ. poſitorum generum *Officium facere*; ſed non *ſatiſfacere*. Omnes autem ſi *iunctis viribus* eidem ſatiſfaciant; erit illa tum demum feliciffima, ac tali in flore conſtituta, per quem hoc erit NOVISSIMVM, quo omnibus eiſdem Ciuib; *nihil unquam debet eſſe ANTIQVIVS*.



COROLLARIA.

1. *Per Philosophiam Experimentalem Realis facta est Philosophia Naturalis, quae antehac mere Idealis propemodum existerat.*
2. *Leges consulto dare, & quae sunt datae exacte observare, est & praecipuis, in quibus Cardo felicitis Reipublicae vertitur.*
3. *Doctrina de Praedicamentis & Locis Topicis materialiter spectata non pertinet ad Logicam.*
4. *Eliezerem, servum Abrahami, Regem in Basan fuisse factum probabile non est, & commentum videtur esse Iudaicum.*
5. *Sententiosum si quis inter omnia genera Stili pro praestantissimo haberet, a vero non aberraverit.*
6. *Symmetriae in Architectura Militari non aequae, ac in Civili, habetur & habenda est ratio.*
7. *Extremitas vel Summitas Amoris erga Deum & Odii erga peccatum non tollit Virtutis Mediocritatem.*
8. *Morem, quo licet hodie Conuiuius aliquas Conuiuii Reliquias secum auferre, iam antiquissimis Temporibus fuisse frequentatum, commemorata apud antiquos conuiuiorum ἀποφῶγτα existimem probare.*
9. *Non solam Lunam, sed quoque Terram, inter causas Fluxus & Refluxus Maris posse referri, verosimile est.*



A D

NOBILISSIMUM & CLA-
RE DOCTVM

DN. RESPONDENTEM
PRAESIDIS

COMPELLATIO.



*Egerrime facio , mi dilectissime RVHFELI, quod
debeo facere quam lubentissime. Cupis Testimonium
tibi aliquod , systaticasque literas , hac mea manu
perhiberi : Nec denegotibi ea, Virtuti tuae debita;
imo vero & libenter eidem illa tribuo. Attamen & aegre tri-
buo, quod est cum tuo a me discessu & abitu coniunctum,
quem non possum non ferre quam aegerrime. Domesticus meus
& inquilinus fuisti ultra quadriennium: Pependisti semper ab
animo, ore & consilio meo; animumque praeterea concilia-
stibi meum assidua tua & indefessa in propriis quibusque studiis
honestis posita diligentia, cum probitate ac integritate morum,
& haud obscuris in Te erecti ingenii dotibus, coniuncta. Qui-
bus proinde & eam tibi ab Ordine nostro Philosophico conci-
lia-
stisti gratiam, ut, praestitis ante, de quo non dubitamus,*

lau.

laudabiliter omnibus, quae Magisterii Candidato praestare hic incumbunt, dignus unanimes consensu propediem à Nobis sis declarandus, quem publica Nostri Collegii auctoritate inter Gradus Philosophici supremi Candidatos cooptemus. Ecce igitur ea, quae ipsa suffragante veritate hac mea manu Tibi promerita tribuo elogia: semper Tui optime futurus memor, quoad vixero; iam vero fausta Tibi discedenti quaevis ac salutaria apprecans ex animo; Teque & tua studia ac commoda Patronis omnibus, qui verae virtutis ingenuos cultores amant, enixissime ac decentissime commendans. Dabam Gisae Hassorum, Mense Septembri, A.R.S. MDCCXII.

ANNOTANDA QUAE DAM:

Quae huic alteri Editioni accesserunt.

Ad pag. 9. potest annotari, pertinere & hoc ad nouissimum morem, ut non tam SVBTILITATIS, quam VTILITATIS, itemque non tam VERITATIS, quam BONITATIS ratio in studiis habeatur: in iisque non tam accedantur RIVVLI, quam FONTES.

Ad pag. 19. potest & hoc addi, quod loco characteris W soleat potius geminum VV in recentiori Orthographia adhiberi.

Ad pag. 28. pro *Epilogo* declarando potest annotari, intelligi in eo per INVENTORES, qui Res & Veritates antea ignotas detegant; per NARRATORES, qui eorum, quae inuenta sunt, publicam faciant notitiam; per CENSORES, qui de inuentis iudicent; per CONDITORES, qui utiliter inuenta & probata condant ac digerant in commodam doctrinae vel disciplinae formam; per DOCTORES, qui commodam tradendis vel explicandis Disciplinis operam nauent; per SECTATORES, qui bonis Doctoribus obtemperent, horumque bonas Doctrinas suas faciant, inque ipsum communis vitae usum conferant; per AVCTORES, qui de augendis & perficiendis bonis disciplinis laborent; per CONSERVATORES, qui bonas & probatas Doctrinas a neglectu & contemptu, nec non a corruptione praeferuent; & denique per VINDICATORES, qui bonas Doctrinas, si iam neglectui contemptuique datae & corruptae fuerint, ab hisce malis vindicent, inque statum pristinum restituant.

Morum antiquorum dum nec cupis esse Pa-
tronus ;

Ecce nouos prodis perdocte non sine laude,
Vtilis hicce labor, R VHFELI, gaudet honore
Insigni, qui nullo unquam delebilis aeuo.

*Hisce DN. Candidato R VHFELIO, Amico suo con-
iunctissimo, Eruditioneque ac Pietate ornatissi-
mo, ex animo gratulari voluit*

JOH. HESS, SS. Th. Stud. Grünbergensis,
Opponens.

Quid Te, quid laudem, mi per dilecte Sodalis?
Cum laudet proprium nunc opus artificem.
Vivat Opus, nomenque tuum delebile nunquam,
Liuida quod nequeat carpere Turba! vale!

*Hisce pauculis clare Docto DN. Respondenti,
dignissimo Magisterii CANDIDATO,
Fautori & Amico suo integerrimo, ad-
plaudere voluit*

JOH. PET. REVSCH, Almersbaco Scynensis,
Opponens.

SVnt ea R VHFELI, quae scribis Apolline digna:
Tu monstras Genium, quod probat Ingenium.
Plaudunt Pierides, resonat conuallibus Echo:
Accipe mente pia Praemia digna! vale!

*Ita Nobilissimo, Doctissimo atque ornatissimo DN.
CANDIDATO de praeclaro specimine gratula-
ri & fausta atque laeta quaenvis ex animo appre-
cari voluit*

A. H. LACKMANN, Oldenburgo - Holfatus,
Opponens.

BOSTON PUBLIC LIBRARY



3 9999 05493 420 1

